

Erosion ta sigui den nos cartera

Kapmento di mata riba nos isla, a causa erosion di e mihor **"santonan"** cu nos tabata tin pa plantacion.

E erosion aki tambe ta tumando lugar den nos cartera.

Esaki nan ta yama **"erosion monetario"**.

Mi ta haya ulcera na stoma tur ora cu mi tende cu nos florin ta fuertemente mara na dollar americano y cu **"nos florin no ta devalua"**.

Esaki ta un di e mentiranan grandi cu ta ser tira den nos cara pa hopi aña caba.

Naturalmente, no a bin dilanti nunca cu nos florin a devalua, pero si ta conoci cu ora nos moneda perde su poder di compra, esaki ta conoci como **"erosion monetario"**.

Si bay tras di e kehonan di ultimo añanan, y especialmente ultimo dianan cu cuenta di awa y coriente a bira double of mas, cu supermercadonan ta subi prijs manera rayo di solo cu ta sali tur mainta, nos tur ta ripara cu nos florin ta birando mas y mas debil dia pa dia.

Si na cuminsamento di aña por a compra 600 florin di cuminda, na Supermercado, esaki seis luna despues, a subi pa 900 florin, pa e mes articulonan y awe, den di siete luna di aña, esaki ta 1000 florin caba.

Prijs di articulonan ta sigui bay laira y cu aumento di prijs di awa, coriente y gasoline, nan ta sigui dispara pa yega **"laboratorio espacial"** prome cu transbordador Discovery.

E prijsnan ta sigui subi, pero e balor berdadero di nos placa, nos moneda, no ta subi cu e prijsnan.

Recientemente nos a haya otro golpi di estado..... ehhhh perdon..., **"golpi di cartera,"** cu e pago pa basura y e florin den nos cartera ta keda mara na e dollar, pasobra cu tur e golpinan aki, e relacion cu e dollar no a cambia.

Nos ta compra menos dia pa dia cu nos florin, pero salarionan riba nos isla no ta subi pa compensa e cambionan y e balor di compra cu nos a perde y lo sigui perde.

Cu prijs di petroleo na 60 dollar pa bari, nos cuenta di awa y coriente, tambe gasoline, a subi mas double.

Con lo ta den temporada di Pasco ora cu nos bin tende cu e prijs pa bari di petroleo ta 80 pa 100 dollar?

Nos lo tende atrobe cu nos florin ta fuerte y cu no tin devaluacion, pero nada lo ser bisa di e **"Erosion Monetario"** cu ta tumando lugar.

Ultimo simannan a cuminsa hinca miedo den mi cerebro bashi.

Nos a tende di caso di salmonella na un restaurant, despues caso di hepatitis B na otro restaurant, y awor tin otro caso di salmonella, varios dia caba, y den un supermercado na San Nicolas, y nada no ta sali afo.

Mi ta haya, cu ora tin e tipo di casonan aki y cu Salubridad Publico ta na altura di dje, mes ora mester manda un mensahe pa comunidad, y avisa tur hende, cu si nan ta sinti cierto sintomanan, nan bishita nan docter, mes ora.

Si bo ta traha den un supermercado y bo ta traha cu carni, pisca, verdura y fruta, empaketa esakinan y bo ta afecta, ta hopi hende bo por afecta cu salmonella.

Aki lo kier bisa atrobe **"no ta nada grave y e ta controla"?**

E negoshi no a wordo cera pa investigacion.

Di mas leu cu a yega, ta cu a test e otro trahadornan y **"dat is dat!" "Afgelopen!"**.

Ta net ora cu tin e tipo di casonan aki, Salubridad Publico mester haci su trabao informativo, esta informa comunidad di loke ta pasando pa precaucionnan tuma lugar, y no laga e baca hoga prome.

TA WARDA E BACA HOGA PROME

Esaki ta locual por bisa di e situacion na Camacuri unda awe tin e dos edificionan "Prendanan di Camacuri", esta Aruba Bank y awor Garage Cordia.

Aki lo no dura mucho cu morto lo por cay ora un of otro vehiculo dicide di lora na man robez, pa bay e lugarnan aki, net na momento cu otro ta bin di pariba.

Di e banco ta conoci cu a wordo menciona cu pronto lo traha riba esaki, y ta un lugar no oficial di staciona auto so a bin.

Tin auto cu ta baha di caminda na man drechi ora nan ta bay direccion aeropuerto, pa despues busca manera pa cruza dilanti otronan cu ta bin direccion rotondo, pa asina nan por drenta pa bay Banco, y awor pa bay Garage Cordia.

Ta bira tempo pa nos expertonan di transito di DOW tira un di dos bista y laga traha riba e asunto aki, prome cu e **"baca cay den poz"**.

Juby Naar

NOS SISTEMA SANITARIO TAMBE TA AFECTA?